



52995/p



BRUN, H. L.



*Jo. M. Joannis*  
**IN LAUDEM**

**CELEBERRIMI VIRI**

**D. FRANCISCI DE LAMURE,**

*REGIS Consilarii Medici, in Ludovicæo Medico  
Monspelienfi Professoris Regii & Decani.*

**ORATIO INAUGURALIS,**

*QUAM pro solempni Studiorum instauratione in  
Ludovicæo habuit, die 6 mensis Novembris  
anni 1787,*

**HENRICUS-LUDOVICUS BRUN,**

*REGIS Consiliarius Medicus, in eodem Ludovicæo Professor  
Regius, è Regiâ Scientiarum Societate.*



**MONSPELII,**

**Apud JOANNEM-FRANCISCUM PICOT, Regis & Universitatis  
Medicinæ Typographum unicum.**

---

**M. DCC. LXXXVIII.**

318332

LIBRARY

THE NATIONAL ANTHROPOLOGICAL ARCHIVES

Smithsonian Institution, Washington, D.C.  
Department of Anthropology

ANTHROPOLOGICAL ARCHIVES

Manibus datæ lilia plenis ,


Purpureos spargam flores , animamque parentis

His saltem accumulem donis.

*VIRG. Æneid. lib. 6.*







## ORATIO INAUGURALIS.

**V**ETERIBUS Ægyptiis solemne fuit Reges ipsos recens ex oculis sublato vocare in iudicium, ut adhuc quasi spirantibus extis, à posteritate, adulari nesciâ, jamjam in illos insurgente, debitum acciperent, laudis si rectè, vituperii si malè imperii res gessissent. Dignum profectò populorum sapientissimi institutum ! diù oblivioni traditum, identidem in magnatum gratiam larvatum, nostro tandem ævo quadantenùs in Academiis renovatum, quæ virorum scientiâ ingeniove præcellentium biographiâ apologeticâ, novos ad eosdem labores stimulos addunt ; in gymnasiis præcipuè recipiendum, juvenum concursu undequaque ad hauriendam scientiam adventantium celebribus, ut auditis virorum qui hæc gymnasia illustrarunt laboribus, & ex his parta laude, utilem pariter meriti æmulationem nanciscantur. Eâ ratione ductus, Viri illustrissimi quem luget Academia nostra præconium, pro solempni studiorum instauratione, dicturus, nullus vereor ne severior etiam philosophia me redarguat, quin contrà vobis, AUDITORES ORNATISSIMI,



gratum me acceptum iri arbitror, dùm Viro optimo, Scholæ nostræ ornamēto, bonis omnibus flebili, monumentum erigam, cordis mei affectus propalans, transitorium heu! nimis, doloris tamen æterni debile quidem, at sincerum specimen.

Virum egregium laudabo ejus imaginem ad vivum, quantum in me erit, depingendo, eumque sub multiplici respectu ostendendo, quo se in Republica litteraria prodiit, Medicinam scilicet docens profitemisque, & orationis istius divisionem ab ipso mutuavi, dùm in eâdem Cathedrâ, eodem munere fungens, pro studiorum instauratione facundissimè ut solebat differens, id assertum extrâ omnem dubii aleam posuit, nempe quod nullus Medicinæ Professor optimus esse possit, quin hoc ipso sit optimus Medicus; illudque firmavit tùm certis rationibus, tùm numerosis exemplis, è diversis Scholis, ex istâ potissimùm petitis. Meum est igitur ostendere ipsum in probationem asserti quod proposuit citari meruisse. Primò itaque eum monstrabo Professoris laude dignum; secundò Practici munere fungentem. Sic palàm fiet qualis fuerit Vir nobilissimus (1) FRANCISCUS DE BOURGUIGNON BUSSIERE, Dominus DE LAMURE,

---

(1) Ortum duxit è nobili stirpe Gallo Provinciali cui nomen *Bourguignon de Bussiere*, sub cujus dominio jamdudum erat pagus *de Lamure* propè oppidum Castelane. Professoris nostri proavus, *Josephus de Bourguignon Bussiere Dominus de Lamure* inter nobiles annumeratus fuit, Regis Legatorum judicio in Gallo Provinciam missorum anno 1666, ut nobilibus jus dicerent; id judicium argumentis munitum hujus familiæ nobilitatem probantibus à sæculo 15<sup>o</sup>. firmatum fuit decreto Regis Consilii intimioris in actis Supremæ Computorum Curiae Mompeliensis & Aquisgranæ perscripto.



Regis Confiliarius Medicus , in Ludovicæo Monspeliensi  
 Professor Regius & Decanus , Regiarum Societatum  
 Scientiarum Monspeliensis & Medicinæ Parisiensis Sodalis.  
 Dicentem me vestrâ benevolentia sustinete aud. orn. quam  
 si non rapiat orationi deficiens lepor , obtineat saltem  
 argumenti dignitas.



PLERISQUE hominibus contingere solet ut eam sortem,  
 quam in civili ordine exequuntur , seu fors objecerit , vel  
 dederit ratio , vel parentum jussus. Ast interdum nonnulli  
 ad quamdam scientiam artemve à naturâ comparati , ad  
 eam quodam veluti impetu ineluctabiliter feruntur , gloriæ  
 quæ eos manet certo quasi instinctu præmoniti. Inter istos  
 reponendus Professor noster , qui oceani procellas &  
 scopulos contemnens ( 1 ) , majoremque obicem superans,  
 patris scilicet indignabundi iram , ex Americâ Monspelum  
 adiit , Medicinæ scientiam ex ipso fonte hausurus , antiquâ  
 Scholæ nostræ famâ permotus , tunc temporis dignissimè  
 fultâ , post nuper extinctum chiracium , recens Parisiis vocato  
 erud. *Astruc* , superstite adhuc qui pestilentia curæ fortissimè

---

(1) Natus in oppido Sancti-Petri in Insulâ Martinicâ die 11 Junii  
 1717 , ex *Francisco de Lamure* , Præfecto tractûs dicti Macouba , &  
*Maria-Annâ Ferry* , in Europam missus fuit anno 1723 , & à cog-  
 natis exceptus Nannetis Armoricorum , ubi prima litterarum rudimenta  
 didiscit , postea eas penitus edoctus in Collegio *de la Flèche* ; post elapsos  
 decem annos Martinicam repetiit , iterum Nannetas , atque inde in Martini-  
 cam redux , exeunte anno 1736 è patriâ Monspelum migravit , quò appulit  
 mense Februario 1737.



sese devoverat *Chycoineau* , tunc ad summum honorum Medicorum apicem evecto , famæ suæ fundamenta jam ponentibus *Fizes & Sauvages* (1).

Solitos magnâ suorum magistrorum & sodalium admiratione labores superatus , ad doctoratus honores summo plausu promotus fuit (2) ; præclaris Viris quos nuper Magistros habuit sese collegam adscire , juvenis adhuc , sed sui genii conscius , speravit , præfagiit ; jamque quid valerent humeri experiri impatiens , quod ex Professorum auctorumve lectionibus , profundâ meditatione suum effecerat , Magistri munere fungens , mirabundis sodalibus effundebat , egregiæ doctrinæ , insignis facundiæ specimina præbens. Naturali instinctu , tum & successu , juvenili animo nunquam non grato , incitatus , quem sibi aperuerat campum , doctior factus , novo citatiorique plausu excurrere perrexit , invictè persuasus certiolem ad summum doctrinæ apicem non esse viam , quam si hasce disciplinas , quas funditus callere cupimus , alios edoceamus , huncque melius doctum evadere qui , re undequaque benè perpensâ , eam aliis explicare nititur. Prima itaque scientiæ medicæ fundamenta habens anatomen & physiologiam , de his cursus eximios edebat , qui famam

(1) Cæteri Professores istorum collaboratores eximii erant *Franciscus Chycoineau* , Cancellarius , Patris Coadjutor , *Petrus Rideux* Decanus , *Antonius Magnol* , *Henricus Haguenot* , *Jacobus Lazarme* , *Geraldus Fitzgerald* , *Eustachius Marcot* , Regis Medicus perpetuo ordinarius.

(2) Ad Baccalaureatum admissus die 25 Julii 1738 , præside D. de *Sauvages* , ad Licentiæ gradum 24 Decembris 1739 , Doctoratum adeptus est die 26 Aprilis 1740 , præside D. de *Sauvages*.



qua in posterum inter physiologos enituit, ipsi jamjam promittebant; nec intereà à vero Medicinæ fonte, praxi nimirum clinicâ, alienus, ad naturæ normam componebat, quæ, licet magni nominis auctoritate munita, ad imaginationem efficta, ultrà veritatis fines excurrerant.

Sic optimâ methodo ad momentosum Professoris munus informabatur: momentosum dico, etiamsi concedatur *Fontenellio* (1) non officio suo deesse Professore, licet jam inventis nihil adjecerit; ipso enim *Fontenellio* judice, ea percalluisse omnia tenetur, quæ cum apud veteres, tum apud recentiores & coætaneos, inventa sunt aut excogitata suam ad artem pertinentia; scriptorum obscuriora loca, quæ multa contingere solent, interpretetur & illustret opus est; auctorum errores, tantò damnosiores, quantò meritis laudibus præstantiores extitere qui errando aliquid humani passi sunt, sedulò notare & expungere necessum habet; tandem quasque docendi methodos justâ severitate pendit, mutat, novas instruit, si quæ cognitæ hætenus aptiores esse videantur, quarum adminiculo artis præcepta tyronum animos expeditiùs subeant, iisque meliùs & altiùs reposita manere possint.

Ad id momentosum igitur munus ritè informato, vacante per obitum (2) clar. *Fitzgerald* regiâ cathedrâ, sese obtulit occasio laborum suorum fructum, tyronibus quidem utilissimum, sed hucusque inter ipsos coactum, palàm proferre;

(1) Mém. de l'Académie royale des Sciences, 1738, éloge de *Boërhaave*.

(2) Die 10 Januarii anni 1748.



coram doctissimo senatu medico , coram civium omni scientiarum genere ornatorum cætu , coram orbe medico avidè expetente doctrinæ specimina à quolibet decertante in lucem edenda , coram doctissimorum antagonistarum acie, in id acriter intentâ ut cujuslibet in arenam descendentes doctrina, omni curâ ac diligentia, tentetur. Nec ipsi quidquam defuit in isto litterario certamine ex quo novam gloriam Nancisci potuerit, seu spectetur ad numerum clarissimorum antagonistarum qui illud ultrò invêre (1), seu ad problemata proposita (2).

---

(1) Candidati fuere *Hugo Gourraigne*, *Carolus Serane*, *Thomas Fitzmaurice*, *Honoratus Petiot*, *Jacobus Farjon* (solus ex his superstes, summâ laude praxim clinicam jamdudâ Monspeliî exercens) *Franciscus de Lamure*, *Franciscus Imbert*. : incepta disputatio die 6<sup>a</sup> Maii 1748, finem habuit die 23 Augusti 1749.

(2) Quæstiones illi propositæ fuerunt. 1<sup>a</sup>. An contractio musculi licet constans & permanens à paralyâ sui antagonistæ oriunda, sit vera convulsio, & eandem therapëiam expostulet?

2<sup>a</sup>. An eruptioni variolarum difficili, laudanum cum cardiacis sit præscribendum?

3<sup>a</sup>. An possit empyema per diuresim expurgari?

4<sup>a</sup>. An vulnera capitis sint periculosiora Parisiis quam Monspeliî, vulnera verò tibiæ sint periculosiora Monspeliî quam Parisiis?

5<sup>a</sup>. Marasmi theoriam & therapëiam exponere.

6<sup>a</sup>. Assignare diversas hydropis abdominalis species earumque theoriam & therapëiam exponere.

7<sup>a</sup>. An sit aliquod signum pathognomonicum febris & quale sit?

8<sup>a</sup>. Cur foetus in utero contentus, urinas nec alvinas fæces ejiciat?

9. An emphysemati sanguinis missio?

10<sup>a</sup>. Cur præparata mercurialia ad debellandam luem veneream ipso



Ea doctissimè solutus, inter illos enituit famæ jam adeptæ non inferior, omnium plausu lauream meruisse visus; aliter tamen judicarunt agonothesæ, qui vel errore humanitati proprio obcæcati, vel, quidni fateremur! forsan malâ quâdam arte ducti, eximium Professore, scholæ suæ decus futurum, ab eâ incauti removissent, nisi ipsi fuisset incitamento passa repulsa; supremum harumce rerum judicem adiit, virum magnum, ingenio & doctrinâ præcelsæ dignitati superiorem, Galliæ Cancellarium *d'Aguesseau*, qui candidati nostri promerita dignoscens, ea pro suâ æquitate remuneravit, eum designans ad primam vacaturam Professoris cathedram (1).

Tali errore vel injuriâ pertæsi nonnulli fortasse contendunt abrogandas esse hæc disputationes, haud absque veri

---

mercurio debite extincto minùs valeant: cinnabarina tamen adversus epilepsiam, quæ venerea non est, magis valeant?

11<sup>a</sup>. Presbytiæ theoriæ & curam exponere.

12<sup>a</sup>. Respirationis difficultatem & frequentiam explicare.

Nonnulla alia, disputationis occasione, opuscula edidit, quæ licet currente calamo conscripta, tamen manifesta indicia præbent ejus in scribendo concinnitatis, in ratiocinando solertiæ; hæc sunt: pathologicarum de febre & palpitatione lectionum vindiciæ; parergon de anevrysmate; examen responsionis clar. *D. Serane*, ad scriptum *Franc. Lamure* cui titulus est pathologicarum de febre & palpitatione lectionum vindiciæ; examen animadversionum clar. *Petiot* in parergon de anevrysmate conscriptum à *Franc. Lamure*.

(1) Coadjutoris titulo inter Professores admissus mense Novembri 1749, cathedram adeptus est die 20 Aprilis 1750, vacantem per obitum *D. Petri Rideux*, Decani.



specie ; sic tamen non censebunt qui rem accuratiùs perscrutabuntur , probè gnari interdùm in optimis institutis aliquid vitii subrepere ; sic non censebat ill. Prof. noster qui ratus , in hisce certaminibus litterariis , haberi optimum criterium eorum qui Professoris munus ambiunt , suam hâc de re opinionem protulit in Oratione inaugurali , pro solemni Studiorum instauratione habitâ , quâ probare fategit ex his disputationibus egregia , tùm in Scholam nostram speciatim , tùm in rem medicam in genere , fluere emolumenta.

Jam ergò arctiori vinculo Scholæ Monspeliensi adstrictus , novus , at non inexpertus , Professor , quidquid in posterum ad artis incrementum patraturus est , hujus celebris scholæ gloriæ propalandæ inserviet. Sic sentiens novam adeptam dignitatem non tam laborum præmium quam incitamentum habuit , undè licet publicis lectionibus intentus , à privatis non abstinuit , studioforum votis obsecundans , queis ut semper in deliciis fuit , ita horum amantissimus extitit ; in his erudiendis assiduam operam navans (1) , eodem quo in arenam descenderat splendore ad metam usque coruscans.

At si dulce est vitæ stadia revocare quæ ad viri clar. gloriam contulêre , scientiæ proficuum erit ejus doctrinam exponere , quidve ad artis incrementum peregerit. Eo

(1) Usquè ad annum 1766 quotannis privatum cursum edidit de institutionibus Medicis ad normam *Boërhaavii* , non quod ejus doctrinæ assentiretur , docendo enim multus erat in refellendis Professoris Batavi dogmatibus , theoriâ mechanicâ nimium redolentibus , sed quod ejus docendi methodum adamussim æmulabatur. Privatim etiam per plures annos docuit anatomicen , materiem medicam , praxim medicam , &c.



tempore quo prima artis iatricæ limina attingebat , fato fungebatur splendidissimum Scholæ Leydenfis decus *Hermannus Boërhaave*. Tanti præceptoris doctrina à clar. Discipulis passim spargebatur , & in Scholis Medicorum principatum facilè sibi vindicabat , super obsoleta galenicorum & pseudo-chymicorum dogmata ; saniori tamen qua pollebat philosophiâ Prof. noster tantæ auctoritatis jugum respuit , certus nihil æquè scientiarum humanarum progressui obstare ac cæca in auctoritatem , quantacunque fit , reverentia ; idcirco *Boërhaavii* doctrinam , mechanices legibus nimium concedentem , velut à rectâ physiologiæ methodo alienam rejecit , *Sthalii* opinionem amplexus ( 1 ) , tunc in Scholâ nostrâ defensam à clar. *de Sauvages*. At nullius addictus jurare in verba magistri brevi perspexit non minùs à veritatis tramite recedere *Sthalium* , cuncta quæ in corpore fiunt animæ imperio tribuentem. Et profectò quis hominem considerans corpore conflatum & animâ , hunc , machinæ instar , mechanicis legibus tantùm regi putaverit ? Quis sepositâ organorum mirâ arte fabrefactorum structurâ , œconomix humanæ functiones conceptibus metaphysicis assequi contenderit ? Ingenii humani ex utrâque parte deliramentum ! à quo , inter utrumque tenentes , immunes ibunt tutissimi , qui plura vitæ phœnomena ex corporis organismo deducentes , suum mechanismo influxum , suum vitæ principio , quaecunque demùm fit , relinquentes , eorum nexus & relationes inquirunt ,

---

( 1 ) Dogmata *Sthaliana* propugnavit in dissertatione quam pro Baccalaureatûs gradu consequendo edidit , cui titulus est *theoria febris*.



ad metaphysicorum scholas demittentes , vagas & nusquam solvendas de entium incorporeorum actione disputationes: Sic sentiens Prof. noster, veterum eclecticorum quadante-  
nūs vestigia premens , ex secum pugnantibus sectis aliquid deprompsit, undè suæ doctrinæ fundamenta jecit (1); eaque firmavit, sagaci non minūs, quam prudenti naturæ interrogatione, experimentorum viâ, tentatâ; in eo dignum æmulum sese præbens clar. virorum *Hales, Reaumur, Duhamel, Haller, Buffon*, qui naturæ seduli indagatores, ejus arcana revelare annitebantur, experimenta, observationes in vivis animalibus instituendo.

Hic nonnullos audio talia experimenta diſterius infamantes, eaque velut parùm utilia, imò in errorem facilè ducentia rejicientes, ex eò quod contendant animalia cultro anatomico subiecta, à statu naturali aliena omninò, nihil minūs quam veram functionum œconomix sanæ imaginem referre. An vero disceptabunt illi, eâ methodo, si non omninò enodatas, saltem plurimùm illustratas fuisse quæstiones de

---

(1) Minimè vereor asserere Virum clarissimum inter primos reponendum esse qui, perspectâ vanitate theoriarum medicarum fundamentis extraneis superstructarum, mechanicis, chymicis, &c. agnoverunt leges œconomix animali peculiares sancitas fuisse, quæ solâ observatione detegi possunt, easque sic ritè observatas basim genuinam sternere theoriæ medicæ. Hancce saniozem doctrinam plurimùm promoverunt Medici Monspelienses *Lamure, Bordeu, Venel, Barthez*, eorumque numerosi non minūs quam præclari Discipuli: duo priores maximè, amicitix fœdere, & laborum communione juncti, ut fidem facit cel. *Bordeu* in procœmio ad disquisitiones de textu mucoso; istius scripta, ut Professoris nostri lectiones, huic doctrinæ evulgandæ maximè contulerunt.



motu sanguinis circulatorio, de respiratione, de digestionem, de osteogenia, de irritabilitate & sensibilitate, de generatione animalium? Fatendum itaque istâ methodo plûs profecisse physiologiam, quam vanis, utpotè ad imaginationem effictis, Medicorum, qui à *Galeno* ad *Harveium* usque floruerunt, hypothefibus.

Non minima igitur Profess. nostri laus erit, eamdem accel. Viri jam citati calcasse viam; eâ enim aliquid adjecit demonstratis physiologicis. Motuum cerebri jam equidem observatorum causam, hætenùs latentem, ingeniosissimis aperuit experimentis, quibus ad demonstrationem evicit hanc deducendam esse à motu refluxo sanguinis per venas jugulares ab expiratione impresso. Hujus inventi gloriam suam esse contendit *Hallerus*, virum nostrum plagii reum incusans, verùm ab ista insimulatione optimè sese vindicavit, eumque in hac lite victorem declaravit regia Scientiarum Academia, ejus commentarium in suâ pretiosissimâ collectione recipiens (1), à quâ arcetur quisquis non invenit aut perficit.

*Weitbrechii* dubiis motus, cogitare cæpit minùs veram esse hydraulico-mechanicorum sententiam de arteriarum pulsatione, quam, ab *Harveio*, tribuebant omnes earum dilatationi, à sanguine è cordis ventriculis propulso, sub eorum sistole, factæ; calculo & experimentis extrâ dubium posuit hujusce causæ falsitatem, & alteritribuendum esse istud phænomenum evicit, nempe arteriarum locomotioni, verosimillimè pendentem à cordis motu subsultorio ejus sistolen comitante. Extat super hac quæstione egregius com-

---

(1) Mémoires de l'Académie royale des Sciences, ann. 1749.



mentarius quem inter suos etiam admisit regia Scientiarum Academia (1).

Extant nonnulla alia ejus doctrinæ specimina, quæ aut à tyronibus avidè excepta manuscripta fervantur (2), aut

---

(1) Mémoires de l'Académie royale des Sciences, 1765. Isti duo commentarii unà cum tertio cui titulus est: Recherches sur la coëne du sang, & epistolâ ad D. *Daumont*, Medicinæ Professore in Universitate Valentinâ, typis mandati Monspeliî apud *Martel*, 1769, venales prostant apud *Tournel*.

(2) Manuscripta extant excerpta è suis prælectionibus de praxi medicâ, de materiâ medicâ; ista, scilicet de materie medicâ, diù inter phylatrorum manus versata, & ab uno ad alium successivè, inter ineruditos adhuc tyrones, transmissa, sic pluribus mendis fœdata, paucis abhinc annis à quodam anonymo typis mandata fuere, sub hoc titulo: Nouveaux élémens de matiere médicale, extrait des leçons publiques de M. de *Lamure*, Doyen des Professeurs royaux au Ludovicée de Médecine de Montpellier, avec des réflexions judicieuses & importantes pour la connoissance des maladies, & l'application des médicamens, dans l'exercice de la pratique de la Médecine, recueillis & mis en ordre par M... Docteur en Médecine au Ludovicée de Montpellier. A Amsterdam, & se trouve à Montpellier chez *François Tournel*, Libraire, 1784, in-4°. Id opus in lucem prodiit inscio D. de *Lamure*, qui illud longè exculcius, & suâ famâ dignius edidisset, nisi ipsi defuisset otium, ut suas lucubrationes, quæ discipulis adeò utiles fuerant, posteris transmitteret. Undè hanc editionem expressis verbis renuit, suis Collegis declarans se neutiquam ad eam contulisse.

Manuscriptæ extant apud plures Medicos, olim Universitatis Monspeliensis Alumnos, primæ lineæ physiologicæ, quas in scholis dictavit: neque parùm de phylatris benè mereretur qui id opusculum ritè ab ipso Auctore acceptum typis mandaret; opus fusiùs de physiologiâ corporis humani scripserat, à quo absolvendo ob praxim uberrimam dimotus fuit, quod hancce Medicinæ partem novis & sagacissimis sententiis locupletasset.



differtationum academicarum formâ typis mandata (1),  
raros exhibent tanti ingenii fructus, at sufficientes, tùm ut  
docendi methodum, quâ & sermonis elegantia & perspicui-  
tate nulli secundus fuit, tùm ut laborem impensum in

---

(1) Harum præcipuas, quantum novi, enumerare juvat.

Conspectus physiologicus pro Baccalaureatû propugnandus à *Ludovico-Honorato Soulier*, 1751.

Positiones ex physiologia corporis humani depromptæ propugnatae à *Joanne-Baptista Teissier*, Havannensi, 1761.

Positiones medico-chirurgicæ de scarificationibus & cucurbitulis, de  
hirudinum applicatione, de vesicatoriis, fetaceis & cauteriis, tandem de  
paracenthesi: propugnatae à *Joanne Guiguou de Lachaud*, Versaliensi,  
1765.

Positiones medico-chirurgicæ de missione sanguinis, prop. ab *Edmundo Oreilly*, Corcagiensi Hiberno, 1765.

De inflammationis theoriâ, ejusque per resolutionem curatione, prop.  
à *Joanne-Ludovico Sanial Dufay*, Cheylariensi, 1766.

De suppuratione & curatione inflammationis per suppurationem ter-  
minandæ, prop. à *Joanne-Baptista Boyer*, Massiliensi, 1766.

Positiones semeiothicæ, prop. ab *Honorato-Genesio Paris*, Arelateni,  
1763.

De secretionum in humano corpore mechanismo, prop. à *Claudio de Chavanne*, Bellojoviensi, 1748.

Primæ lineæ pathologicæ, prop. à *Renato-Zacharia Mereau*, Piſta-  
vienti, 1766.

Primæ lineæ therapeuticæ, prop. ab *Alexandro Rouchet Duverger*,  
Vivariensi, 1766.

De variolis, cui accessit appendix de inoculatione, prop. à *Francisco Berthelot de Beauregard*, Bercoriensi, 1767.


De sensibus externis speciatim, prop. à *Carolo-Ludovico Perreau de Laberderie*, Rûpellenſi.



edocendis variis Medicinæ partibus percipere possimus.

Hisce laboribus intentus, mentis propensione magis quam officio, sed ab his sæpiùs abductus, crescente in dies apud illum ægrotantium concursu, Scholæ celeberrimæ jamjam Decanus (1), summâ quâ mihi favebat benignitate motus, suis lectionibus & exemplis instructum me sibi suffectum voluit in instituendis Academicis prælectionibus, ac post tolerata publicæ disputationis pericula, à regiâ auctoritate coadjutorem petiit, me illi adeò imparem, cujus vestigia longè sequi ut gloriosum ità dulce mihi semper erit. Utinam sic feligens in vituperium non inciderit! utinam temeritatis non arguar, Viri celeberrimi loco sedere ausus! quem si pro dignitate non adimpleam, ad meliora nunquam non addet animos, ardens, modesta tamen, eum imitandi cupido.

Jam Professoris laude dignum monstravi clar. Virum; non minori inclaruisse famâ in exercendâ praxi nunc meum est ostendere; sic iterum dicentem vestrâ benevolentîâ sustinete.



**S**I verum sit nullum esse posse Medicinæ Professore optimum, quin hoc ipso sit eximius Medicus, ex jam dictis satis superque probatum foret virum egregium practici laudem meruisse; quod utique à cordatis viris minimè negabitur, qui perspectâ officiorum sphærâ quam absolvere debet Medicinæ Professor, apprimè intelligent ad eam omninò impari fore, nisi frequentibus apud ægros aditionibus, &

---

(1) Ab anno 1767, post abdicationem D. Haguenot.



affiduâ eorum curatione , morborum proteiformes modos & phasés internosse , naturæ morborum curatricis miras & ineruditas artes imitari , hanc appositis auxiliis opportunè juvare , huic saltem nunquam nocere , apprimè didicerit : aliter nequidem scripta Medicorum intelliget , quamvis ea , sedens in musæo , nocturnâ diurnâque manu versaverit , & quod pessimum , à se credet intelligi. Horum intimè persuasus Prof. noster curandis ægris maturè sese addixit , horum tamen copiam non quærens , sed eum numerum qui sufficeret notandis singulis apud quemlibet ægrotantem supervenientibus. Hac methodo summam nactus erat ergà veteres admirationem , quorum observationes mirè cum suis congruere videbat ; indè morborum subinvansionis incrementi & exitûs verissimas picturas & delineationes , medicaminum accuratè notatos effectus , variarum medendi rationum eventus , fausti fuissent infausti-vè , summâ fide diligenter observabat. Indè sensim medendi methodum sibi comparabat , non ex ullâ auctoritate , duce non rarò fallaci , sed propriâ experienciâ acquisitam , ipsi filum suppeditantem , quo per intricatissimum praxeos dedalum tutò & expedite progrediebatur. Sensim gliscebatur fama in dies , donec ad summum evecta fastigium externos undequaque advocabat morborum diuturnorum sanationem apud illum quærentes. In his debellandis ægritudinibus quæ vel innatâ ferociâ optimos artis conatus elusêre , vel statim intempestivâ medicatione tentatæ , novas vires acquisivêre , quæ idcirco artem expostulant humanæ penè dicam superiores , maximum sese præstitit , pluresque dimisit firmâ valetudine gaudentes , quos de vitâ desperantes exceperat. Absit nos



minuere velle laudem à Medico partam in curandis morbis acutis , at major debetur illi qui chronicorum curationi incumbit. In his enim vividi & efficaces naturæ motus , etiam invitâ pravâ medendi methodo , non rarò morbum discutiunt : & fatendum quod si quandòque minùs æquum vulgus infaustos eventus medenti tribuat , sæpiùs ejus honori successus vertat qui omninò naturæ debentur. Contrà in chronicis plerùmque iners ista totum curationis opus Medico relinquit , cui ergò id agendum incumbit , ut tollantur profundè radicati morbi , erigatur vis vitæ torpida , muniatur ægrorum mens contrà diuturnæ curationis tædia , & quidni fateremur ? Firmetur titubans inter dubia ab adversis Medicorum sententiis suborta. Hinc tota sua est laus à Medico parta in curandis longis ægritudinibus , dùm hujusce laudis partem sibi vindicat natura in acutorum curatione. Prætereà qui acutos curat , is suis concivibus tantùm utilis est : qui curat chronicos , & in ea nobili operâ famam sibi comparare novit , is ad omne humanum genus scientiæ salutiferæ dona extendit. Undè si indubitanter ad priorem pertineat corona civica , qua eum remunerare solebant Romani , qui in prælio civem servaverat , alteri , cum istâ simul , alia decernenda foret , verbo sit venia , Cosmopolitana dicenda. Neque comparatione nimis superbâ duci videar , bellatori æquiparans Medicum , qui , inquit nonnulli , absque dedecore ignavus , nullo vitæ discrimine , suum munus obit , dùm proprio periculo semper pugnat miles : ecquis tamen dicet majori pollere virtute qui morti sese offert in medio armorum strepitu , virtutis exemplis undequaque cinctus & incensus , illo qui lethum tacitè



quidem , sed non minus certò serpens , iterata clade monitus , at impavidus , inter hominum perterritorum luctus , solus fortis , sibimet-ipsi imminens intuetur ? Hic vos testes appello magnanimi Medici qui morborum epidemicorum curationi ultrò incumbentes , periculi undequaque vos ambeuntis conscii , patriæ saluti vos devovistis ! quis adeò parùm æquus fortissimi animi laudem vobis dene- gabit ? Non tantùm itaque de patriâ , sed & de toto humano genere , bene meretur Medicus , ad omnia sui officii munia paratus , & talem sese præstitisse Professore nostrum nullus inficias ibit.

In eo morborum genere tractando præsertim excelluit , quos non immeritò Medicorum opprobrium dixêre , nostrâ ætate adeò frequentes , quos rectè philosophi vitæ intemperantiæ , & divitiarum abusûs flagellum vocarent , nisi pari passu invaderent illi , ærumnis conflictatos , aut mentem acriùs exercitantes , uno verbo affectus nerveos. Ecquis unquam ad hosce affectus sanandos à naturâ aptior fuit ? Insigni facundiâ donatus , alienis miseriis motus , his levandis paratissimus , quorum existimationem suâ famâ rapuerat , eorum animos , ingenii comitate , morum honestate , sermonis lepore , alliciebat. Indè in facilè desperabundis mentibus , spem , ultimam malorum requiem , erigebat , fidem-que erga auxilia medica mox fugituram revocabat , & in maximè titubantibus stabilem reddebat. Fuit ergò , ut *Baglivii* verbis utar , Medicus sermone potens & artium suadendi peritissimus , tantam vim , dicendi facultate , medicamentis suis adstruens , tantam doctrinæ suæ fidem in ægris excitans , ut interdùm , vel abjectissimis remediis , difficiles morbos superaverit.



Non tamen ideò existimetis , Aud. ornat. , in hisce arduis casibus , totam ejus constitisse Medicinam in auxiliis moralibus ; vitiorum organicorum functiones corporis lædentium attentus observator , his debellandis idoneam opem ferebat ; neque ulli methodo exclusivæ addictus , hæc solis diluentibus , juxtà quorundam placita , nec solis roborantibus , aggrediebatur , sed plerùmque ritè sociatâ utrâque methodo ; sic plures novi gravissimis affectibus nerveis radicitùs sanatas ab illo mulieres , post præmissa diluentia , audaci thermarum bellilucanarum usu , hactenùs ab eorum curatione indoctâ formidine expunctarum.

Naturæ viribus maximè confidens , ubi hæ sibi sufficere videbantur , vel ab omni remedio abstinebat , vel si importunè aliquod extorqueretur , id planè iners , aut levissimæ efficacix concedebat , dubius utrùm , inter curandos morbos , *securè* Medicus eò ducere possit , quò natura , etiam cum bonis ægri rebus , vergit , aut vergere videtur , aut solet ? Neque tamen naturæ moliminum adeò otiosus spectator erat , quin crederet doctrinam veterum circa vires naturæ medicatrices , stare posse & debere unà cum legibus Medicinæ prudenter activæ.

Insurgant nunc artis utilissimæ detrectatores , sui scepticissimi fundamentum eruentes , ex eò quod plures per celebres Medicos de suâ arte dubitantes asserant ! nostrum etiam Professore inter illos annumerent ! at certi sint se talia fando à vero aberrare. Quis enim potiori jure Medicinæ credere poterit quam ejus utilitatis quotidiani testes , ejus portentorum assidui opifices ? Sed isti funditùs artem callentes , ejus limites apprimè norunt , & sese naturæ



ministros tantum proficientes, eam ægrotantium saluti proficientem certis signis cognoscentes sibi ipsi permittunt, huic duntaxat opitulantes ubi deficere videtur, eam juvantes doctâ imitatione eorum quæ patrare solet apud eos quos ipsa sanat. Sic natam Medicinam longa firmavit observatio, præcipuum, ne dicam unicum ipsius fulcrum. Sic sentiebat ill. Prof. noster quascunque theoreticas disquisitiones, tanquam mera imaginationis figmenta, ex artis exercitio rejiciens.

Nequis tamen inde concludat cæco empyrismo ductum fuisse; duplicem admittebat theoriam (1), aliam quam vocabat rationalem, qualem requirebat prisca Medicorum rationalium secta, aliam quam dixit empyricam, qualis, etiam à veteribus empyricis, non rejiciebatur; ista causarum evidentium, & multiplicium circumstantiarum, quæ aliquam in medendo differentiam inducunt, concursu exurgit; hæc curiosius investigat quidquid ad corporis structuram, ejusque intimam alterationem, pertinet; istam velut Medicinæ physicam habebat Vir clar. eamque naturæ rerum contemplationem, Medicum non facere, cum *Celso* opinabatur, aptiorem tamen Medicinæ reddere, excitando ejus ingenium; eam adeò ab artis exercitio tantum ablegans, utpotè damnosam si regulam daret faciundæ Medicinæ. Theoriæ empyricæ fundamenta eruebat, ut jam diximus, ex singulis quæ in medendo aliquod afferunt

---

(1) Vide ejus commentarium de causâ pulsationis arteriarum, cui nonnulla adjecit corollaria quæ satis superque ejus sententiam super istud argumentum patefaciunt.



hisce otiis diu potitus esset, si amicorum vota non fuissent irrita, cum, in mediis laboribus, humore atrabilario correptus, pridem in corpore latitante, statim sub fat benignâ specie erumpente, mox omnem suam ferociam manifestante, septuagenarius, multis ille bonis flebilis occidit (1): cognatis quorum amantissimus fuit, conjux optimus (2), patruus beneficentissimus (3): amicis, qui eum & prudentissimi consilii, & ad omnia obsequia paratissimum nunquam non experti sunt: vobis Collegæ spectatissimi! quorum exemplis quotidie certior fiebat optimos quosvis Medicinæ Professores, idcirco neminios Medicos esse; quos justâ existimatione prosequens, fraterno colebat amore: vobis philiatri amantissimi! Scholæ nostræ spes altera, quos parentis instar diligens, omni officiorum genere fovebat: patriæ adoptivæ, quam suâ famâ ornabat: humanitati, quam morbis conflictatam sanabat, ærumnis gravatam consolabatur: nulli verò flebilior quam mihi, cui ob propius contemplatas dotes eximias, ob singularem quâ me fovit humanitatem, grati, addictique animi affectus, vitam, quantacunque super sit, luctu indelebili obruent.

DIX I.

(1) Die 18 Martii, anni 1787.

(2) Uxorem duxerat anno 1751. N. D. Ludovicam Guilhe, ex oppido Bollene in Comitatu Vindascino, multiplici dote commendabilem, cujus summa laus erit tanto conjugii nuptam fuisse. Nullam ex eâ prolem suscepit.

(3) Bonorum suorum hæredes instituit Dum. de Lamure in legione Martinicæ ducem, ejusque binas sorores, quos ex fratre natos, virtute magis quam consanguinitate affines, sibi filios adsciverat.







